

DOMENIE XXII «VIE PAL AN»

Antifone di jentrade cf. Sal 85,3.5

Ve dûl di me, Signôr,
che o ài berlât viers di te dute la zornade:
tu tu sês bon, Signôr, e tu perdonis,
tu sês cjamât di boncûr cun ducj chei che ti clamin.

Colete

Diu di ogni perfezion, che al è to dut ce che di miôr al è tal mont,
semene tai nestrîs cûrs l'amôr pal to non,
nudrîs in nô, cul cressi de fede, dutis lis robis buinis
e, cul nestri impegn, vuarde ce che tu âs nudrît.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Dt 4,1-2.6-8

No zontarês nuie a ce che us ordeni jo, ma o metarês in pratiche i comants dal Signôr.

Dal libri dal Deuteronomi

Mosè al fevelà al popul disint: «Cumò, Israel, scolte lis leçs e lis usancis che us inegni vuê, par che lis metês in pratiche, par che o vivês e o jentrais di parons te tiere che us dà il Signôr il Diu dai vuestris vons. No zontarês nuie a ce che us ordeni jo e no cjonçarês nuie, ma o metarês in pratiche i comants dal Signôr vuestri Diu, come che jo us ordeni. Tignîtu cont e metêtu in pratiche e cussì o varês sintiment e esperience denant dai popui. E cuant che chei a cognossaran dutis chestis leçs, a berlaran: Al è dome un popul sapient e espert, dome chest grant popul culî! Cuâl isal mo un popul tant grant che i siei dius i van dongje come che il Signôr nestri Diu al fâs par nô ogni volte che lu prein? E là isal un popul tant grant che lis sôs leçs e lis sôs usancis a son justis come cheste leç che us ài ordenât vuê?».

Peraule di Diu.

SALM RESPONSORIÂL dal Salm 14

R. I monts di cûr a vivaran te cjase dal Signôr.

Signôr, cui podaraial vivi te tô tende?
Chel che al cjamine te onestât,
che al pratique la justizie e tal so cûr al dîs la veretât.
Chel che nol met fûr cjâcaris cu la sô lenghe. **R.**

No i fâs dal mâl al so prossim
e chel dongje di lui nol svilane.
Chel che al spresee l'om plen di tristerie
ma chei che a àn timôr dal Signôr ju onore. **R.**

Chel che nol dà i siei bêçs fasint usure
cuintri dal inocent nol cjape regâi.
Chel che al fâs cussì,
nol cloparà par mai. **R.**

SECONDE LETURE Jc 1,17-18.21-22.27

Viodêt di jessi di chei che a metin in pratiche la perauale.

De letare di san Jacum apuestul

Fradis miei cetant cjârs, ogni bon regâl e ogni don refinît al ven di adalt e al ven jù dal Pari de lûs, che nol cambie mai e che nol svarie in nuie. Lui al à volût fânus nassi midiant de peraule de veretât par che o fossin la flôr des sôs creaturis.

Acetait cun ubidience la peraule che e je stade plantade in vualtris e che e pò salvâ lis vuestris animis. Viodêt di jessi di chei che a metin in pratiche la peraule e no dome che le scoltin, imbroiansi di bessôi. Une religjon monde e cence magle denant di Diu nestri Pari e je cheste: viodi dai vuarfins e des veduis e stâ vuardâts di ogni sporcjetât di chest mont.
Peraule di Diu.

CJANT AL VANZELI Sal 26,11

R. Aleluia, aleluia.

Mostrinus, Signôr, la tô strade,
meninus pal troi di justizie.

R. Aleluia.

VANZELI Mc 7,1-8.14-15.21-23

Butant di bande i comandaments di Diu, vualtris si tacais tor de tradizion dai viei.

Dal vanzeli seont Marc

In chê volte, si derin dongje di Jesù i fariseus e un pôcs di scrituriscj vignûts di Jerusalem, che a vioderin che cualchidun dai siei dissepui al mangjave cun mans socis, ven a stâi no lavadis. Di fat i fariseus, come ducj i Judeus, no mangjin se prin no si son lavâts lis mans par fin, seont la tradizion ereditade dai viei; e, ancje tornant dongje dal marcjât, no mangjin se prime no si son smondeâts. Ind è ancje tantis altris robis, che lôr a àn cjapadis e che a scuegnin praticâ, come resentâ lis copis, i creps e i vâs di ram. Sigheduncje i fariseus e i scrituriscj i domandarin: «Parcè i tiei dissepui no si compuartino daûr de tradizion dai viei, ma a mangjin il pan cu lis mans sporcjis?». Ur rispuindê:

«Isaie al à profetât propit ben di vualtris, fals, come che al è scrit:
“Chest popul mi onore cui lavris,
ma il lôr cûr al è lontan di me.

La lôr religjon par me no ur zove nuie,
dal moment che a insegnin dutrinis che a son precets di oms”.

Di fat, butant di bande i comandaments di Diu, vualtris si tacais tor de tradizion dai viei».

Alore, tornade a clamâ dongje di se la fole, ur diseve: «Scoltaitmi ducj e cirît di capîmi! Nol è nuie difûr dal om che, jentrant dentri di lui, al puedi sporcjâlu. A son invezit lis robis che a jessin dal om chês che a sporcjin l’om. Di fat di dentri vie, ven a stâi dal cûr dai oms, a vegnin fûr i triscj pinsîrs, lis fornicaions, lis robariis, i sassinaments, i adulteris, lis bramis, lis tristeriis, l’imbroi, lis porcariis, l’invidie, la blesteme, la supierbie e la stupiditât. Dutis chestis brutis robis a saltin fûr di dentri vie e a sporcjin l’om».

Peraule dal Signôr.

Su lis ufiertis

Cheste sante ufierte nus siguri simpri, Signôr,
la tô benedizion e la tô salvece
e cu la sô fuarce e colmi ce che e opere intal misteri.
Par Crist nestri Signôr.

Antifone a la comunion Sal 30,20

Cetant grant che al è, Signôr, il to boncûr!
Tu lu tegnis di bande par chei che ti temin.

O ben: Mt 5,9-10

Furtunâts chei che a lavorin pe pâs, parcè che ur disaran fîs di Diu.

Furtunâts chei che a son perseguitâts par colpe de justizie,
parcè che il ream dai cîi al è lôr.

Daspò de comunion

Nudrîts cul pan dal cîl, ti preìn, Signôr,
che chest sostentament dal to bonvolê al rinfuartissi i nestrîs cûrs
e nus sburti a servîti intai nestrîs fradis.
Par Crist nestrî Signôr.